



59470



Mag. St. Dr.

kal.komp.

*Pecherzyski Stanisław: Conclusiones ex universa
Philosophia aristotelis speculative.*

648045

A. D. O. M. H. C.
CONCLUSIONES

EX

VNIVERSA PHILOSOPHIA
ARISTOTELIS SPECVLATIVA,

ad Mentem D. THOMÆ Doctoris Angelici,
in Alma Vniversitate Cracoviensi,

CONCINNATÆ:



SUB PRÆSENTIA

M. ALBERTI TOPINSKI,

in Collegio Majori Regij, & Cursûs Philo-
sophici Vladislaviani Professoris,
Canonici Sanctæ ANNÆ,

Per

STANISLAUM PECHERZYNSKI,

Artium Liberalium & Philosophiæ Baccalaureum,

Publico Certamini,

EXPOSITÆ.

Anno Domini 1695. Die 30. Octobris.

Horis Pomeridianis.

CRACOVIAE, TYPIS VNIVERSITATIS.

J. XXII. 28. iii.

In Gentilitium Insigne,
 Illustrissimæ Domus
STRASZEWSCIANÆ.



59420
 Læta solet meritò magnos celebrare Triumphos
 Patria, STRASZEVII quando Trophæa videt.
 Namque sub hoc LABARO truculentos Lechia vicit
 Hostes, VIRBOVII quando fuere Duces.
 Extensum spectas VEXILLVM? concipe mente,
 Semper STRASZEVII bella parare solent.

LVDOVICVS de KURDWANOW KURDWANOWSKI,
 Pœscos Studiosus

ILLVSTRI ac MAGNIFICO DOMINO,
D. CHRISTOPHORO,
 DE STRASZOW
STRASZEWSKI,
 Domino & Patrono Obseruandissimo.



Loriosa sine ferro & cæde peracturus certamina Iagellonicus Stagirit-
 tes, nunquam cum certiori spe victoria potuit in arenam descendere,
 quam sub victorioso Gentilitij Tui Vexilli trophæo. ILLUSTRIS &
 MAGNIFICE DOMINE. Quidni enim sub Virbouiano palmari
 signo infallibiles sibi Iagellonici Peripati Sparta ominari debeat victori-
 as? quod armatura fortium Cruce Christi munitum, immortales ne-
 dum Sarmatico, sed toti Christiano Orbi attulerit triumphos. Quid hoc Laboro victo-
 riosius? quid Augustius? quid Patria felicius? quid hostibus terribilius? cuius virtu-
 tem non tantum robur & as triplex aduersi Martus, verum etiam ipse Phlegeton formi-
 dauit: ad cuius presentiam Tauricani prædones totis artibus tremebant. Sub hoc Au-
 gusto Vexillo non trecentos Fabios, sed innumeros suos defensores vidit Patria, & am-
 plissimis honoribus coronauit. Regno coæuum hoc Labarum, inuictos semper non con-
 tra vnâ Numantiam exhibuit Scipiones. Non inuidemus Romanis Vexilla Aquilis
 insignita, sub quibus felix fuerat victoriarum omen, sub quibus tributaria gentes Romam
 adorabant, & vectigalia deferrebant Tybri; cum & Sarmatix Regnatricis Aus, in Virbo-
 vianis Vexillis, semper triumphale fuerit signum, & auspiciu felicitatis. Non mi-
 ramur pictos Leones apud veteris, nouiq; ani Ductores in Labaris tumide ostentatos, cum
 Sanctiori Ioui consecratum Vexillum RADWAN, non nomine tantum, sed re probata
 fortitudinis Martys laboribus Poloniæ demonstrauerit Leonidas. Sub hoc signo per tot
 seculorum myriades, longo syllabo militantes recenset in vtrâq; militia triumphis celebran-
 dos Bellona Sarmatica Heroes. Non pellem Leonis, sed animum induiti prodiere in cam-
 pum, & aciem pro Patria inuictissimi Alcide. Nempe hoc Vestra gloria familiare or-
 namentum, hoc innatum & a sanguine Maiorum traductum virtutis priuilegium est,
 Magni Virbouianæ Familiæ Scipiada, quod ad ingentia quæq; nati, nihil non augu-
 stum & stupendum in Vexillo Vestro ad perpetuam rei memoriam omnibus ætatibus
 exhibeatis. Hoc est augustum & ingens nulla quod rapit dies meritorum Vestrorum au-
 stomentum, quod hæcenus Patrij & Exotici Soles admirantur & venerantur. Neq;
 ego hic Fastos gestorum Vestrorum triumphales, & Iliadem ingentium Meritorum ad nu-
 cleum reuoco, cum magnitudo rerum, quam gessistis, nec in Iouis Dipthera describi vale-
 at, sed tributaria duntaxat veneratione assurgo magnis Nominibus præclara Virbouianæ
 Familiæ, & Martes Poloniæ, Romanorq; augustius omnium virtutum Pantheon à limi-
 ne veneror. Extinctum Iacvingorum nomen, quomodo illustrat gloriosum Vexillum
 hoc, quomodo Moscheuiticus infestus nostris Trionibus Eques sub eo militantes Epaminon-
 das inuitus prædicet, publica fama gestorum nuntia Regum, & totius Reipublica clari-
 oraculis ad stuporem posteritatis loquitur. Stant ex hac Familia, velut ex Equo Troia-
 no oriundi in triumphalibus curribus Æmilianî. Presentantur digna cælesti Capitolio
 Heroum imagines. Adhuc Primatialis Gnesnensis Sedes, suos omium elagiorum Apothe-
 osi celebrat Archiprasules, quos illi VIRBOUIANA FAMILIA ministravit.
 Adhuc Curules, & omnium honorum subsellia gratulantur sibi ex hac Prosapia, au-
 rea consiliorum edicta depromentes Catones. Stant Magnorum Nominum umbra Illu-
 stres, & hostes in perniciem Poloniæ inhiantes terrent, dum perennans post funera virtus
 inuictissimorum ex Sanguine Virbouiano ductorum felicissimis victorijs hostium teme-
 ritati illatam cladem & excidium commemorat. Amplissimam omnium virtutum con-
 geriem, vel in Te vno liceat admirari MAGNIFICE DOMINE. In quo concentra-
 ta Maiorum merita & probitatis vigor, oculos animosq; Polonorum in admirationem
 rapit. Non extinctus tot Antenatorum Tuorum, qui sub stemmate hoc triumphales du-
 xere dies, Splendor: sed in immensum auctus, oculos Aquila Poloniæ delectat. Masculus
 ille

ille Gottardi Spiritus, pro Patria vitam & sanguinem olim gloriose litans, post celeberrimos Summis in Patria honoribus & victorijs Aborigenes, licet quidem in tot Familiarum sub hoc signo militantium decora diffusus sit, in Te tamen maxima eius portio, sedem sibi figens, hactenus infractos pro Patria ingentibus laboribus Anchisiadas progenerat. In Vestra inclyta Domo magni STRASZEVII, siue Numas, siue Catones, siue Camillos postulauerit Patria, semper vota eius coronasti, desideria impleuisti, quia fudis ingentibus, Fastos Polonos hodie quoque implere non cessatis. Longo syllabque recensere possem seriem meritorum Vestrorum, summam in Deum Diuosque pietatem, omnibus imitandam fortitudinem, humanitatem, comitatem, qua pares Macedonibus & Titis in Polonia PolonSTRIS olim & MAGNIFICUS DOMINUS PETRUS STRASZEWSKI, desideratissimus Parens Tuus. In hoc Viro, omnium virtutum senatus theatrum sibi gloria explicuit, Grandaeum Areopagitam dixisses, aut unum de Colophonis, cum oracula consiliorum funderet, cum omnibus ex asse sincerus amicum pectus exhiberet, & prona humanitatis studia testaretur. In eo integerrimos antiquioris aui mores, usque ad delicias Polonia spectare soles, in eo animus ille optima politia imbutus, amicis communicabilis, beneuolus, & non sibi viuens, enitebat. Nulla illi Studiosior erat sollicitudo, quam desuper collata munera & opera, in Diuorum adyta profundere. Adhuc sacrationes Laboriferis Ecclesiae Ara, monumenta liberalitatis ab eo fundata, posteritati ad imitandum praesentant: nempe non aliter Vir piissimus sub Labore suo triumphali trophaa sibi erigere voluit, quam cum Deo Statori se suaque deuoueret. Porro cum Astris deuota semper gerant pectora STRASZEVII, etiam castris bellicissimi Martigena & Bellona Sarmatica, nunquam non grati extitere. Ingressus est triumphali passu immortalitatis Capitolum fortissimus Heros ALBERTUS Germanus Tuus, qui ut Patria staret, in medijs belli Othomantici astibus, gloriose occubuit. Vita interminabilis lucrum existimauit hic Sarmaticus Curtius pro Patria mori, pro Fide Orthodoxa seipsum ferre in victimam Libitina. Manebant Laureae triumphales & JOANNEM, nisi Socij vita humana casus, & Parca eius gloria inuida, viam ipsi ad victorias praecoci obitu praeclusissent. Sed quid ego manifesta orbi Polono STRASZEUIANAE Virtutis Symbola, imbecilli suada illustro: Tu mihi omnium virtutum Epitome & compendium es, Tu apex & Corona meritarum, quae in Tuis Antenatis spectabat orbis JLLUSTRIS & MAGNIFICE DOMINE. Magnanimitatis Tua documenta ipse Lydius fortium animorum lapis maximus, Bellatorum, Victorum & Triumphatorum Augustissimus Regum JOANNES III. Vidit ille, quomodo infestas hostium acies, Tua Virtus intrepide aggressa, semper palmam reportauit. Nihil bellacissimo Spiritui Tuo dulcius, quam per medios Barbarorum cuneos, victoriam quare. Palmare Vexillum Tuum, sub inuictissimi Clypei, protectione ad omnem pro Patria defendenda occasionem, felicissime eleuasti. Vnde merito inclyto sanguini STRASZEUIO, & virtutum Senatus magnarum Familiarum decora adiuncta sunt, post Ascias Morficorum, quae Architecta felicitatis sunt; post ROSARUM SZEMBECIARUM, Augustam Purpura; hodie Tibi felicissime Suffragatur DEMBINSCIORUM Amazon, ut ubique Victor non solum in armis, sed etiam in animis Polonorum exislas. Ipsa JLLUSTRIS & MAGNIFICA Pulcheria Tua CAECILIA, DEMBINSCIANI Sanguinis Gemma, quam vinculo amicitiae coniugalis aeternum Tibi sociasti, unitam gloria virtutem in Vexillo Tuo expressit. Atque cum ex illa Lucina, Patriae Heroas & Aeneadas feliciter Polonia dederis, etiam magni Nominis & accrescentis summam gloria auxesi JOSEPHUM Fratrem Tuum uterinum superum obsequium deuouisti: qui mira ingenij excellentia & modestia in Patrio Orbe fulgens, etiam Romanis Capitolijs Labari sui Gentilitij, palmare signum ingentibus meritis & virtutibus demonstrat. Quare Victor Philosophantium Princeps prodeat sub hoc signo in concertantium animorum Olympia, qui beneuolentiae Tuae stimulis, ad eruditum certamen prouocatus, coronamentum votorum se affecuturum minime dubitat. Interim vero ut Te Superi quam diutissime sospitem & felicem seruent, amplissimis in Republica honoribus ornatum, omnibus benedictionibus caelitus cumulatam, hoc profundi obsequij & animi mei votum pono.

Vti Tuo Nomini & Honori Obsecratus
 Seruus & Client

STANISLAUS PECHERZYNSKI,
 AA. LL. & Philosophiae Baccalaureus.

CONCLUSIONES

E X

PHILOSOPHIA RATIONALI.

I.



Logicæ obiectum Formale & adæquatum dictum *Quod*, est Ens rationis, non in tota latitudine, nec limitatum ad modos sciendi, sed vt est veri ostensuum, seu Directiuum operationum Intellectûs, voces autem sunt tantum obiectum materiale, obiectum verò *Quo*, seu ratio formalis sub *Qua*, est partim abstractio, ab omni materia negatiue, partim principia Logicæ propria. Hinc est quod Logica sit purè scientia simpliciter Speculatiua, & secundum quid seu improprie, vt vtens, est Practica, estq; simpliciter necessaria ad alia scientias in statu perfecto acquirendas, imò & conseruandas. Ens porro Rationis, quod consistit in quodam esse ficto, cum fundamento in re, & fit formaliter à solo humano Intellectu, idq; non nisi pro hoc statu; non cognoscitur per propriam speciem impressam, aut per alienam s. Entis realis, bene tamen per expressam.

II.

Præter Singularia & voces, dantur à parte rei Vniuersalia materialia in singularibus, non autem separatim existentia, quæ præter vnitatem numericam, habent à parte rei vnitatem Formalem, quæ non est Communis positiue Individuis, sed tantum negatiue. Gradus Metaphysicos in eodem subiecto existentes tantum solâ ratione ratiocinatâ differre asserimus. Porro vniuersale formaliter sumptum non est à parte rei, quod, si Metaphysicè sumatur fit per abstractionem Intellectus agentis, & perfectius per præcisionem Intellectus possibilis, Logicè vero acceptum fit per Intellectûs possibilis Comparisonem simplicem, non verò compositam. Prædicabilitas est propria passio vniuersalis Logici, quod adæquatè diuiditur in Genus, Speciem, Differentiam, Proprium, & Accidens, estq; Genus ad illa.

III.

Rectè definitur Genus à Porphyrio licet non essentialiter, per prædicari de pluribus specie differentibus in eò quod *Quid* est, cuius definitum particulâ *Quod* explicatum, est ipsa secunda Intentio, vt connotat naturam, quod idem in alijs prædicabilibus proportionaliter est intelligendum. Et hoc Metaphysicè sumptum, non prædicatur de speciebus vt pars, sed vt totum potentiale (idem proportionaliter intelligendum est de differentia) taliter etiam consideratum non potest saluari in vnica specie. Hoc in substantijs materialibus, à materia, sicut differentia sumitur à forma, puta radicaliter, nam proximè ambo sumuntur à tota natura specifica; in Immaterialibus verò seu spiritualibus substantijs s. Angelis, Genus sumitur à tota illorum essentia seu natura specifica, differentia verò sumitur ab eadem illorum essentia, secundum id quod sibi proprium est; tandem in accidentibus, Genus sumitur à simplicissima illorum essentia, vt determinabili, differentia autem ab eadem essentia, vt dicit ordinem ad extrinsecum subiectum à quo completur & causatur.

IV.

Species vt est vniuersale, rectè definitur per prædicari de pluribus solo numero differentibus in *Quid*, quæ definitio conuenit speciei specialissimæ, idq; solum, vt est prædicabilis, in qua Relatio subiicitilitatis, est distincta à Relatione prædicabilitatis, quæ duæ Relationes non habent inter se ordinem passionis & essentia. Species Metaphysicè sumpta saluatur in vnico Individuo, vnde natura Angeli vnum habens Individuum, ex modo nostro concipiendi potest subire intentionem vniuersalis. Individuum porro primò intentionaliter acceptum,

A

defini.

definitur esse, cuius collectio proprietatum ita est in vno, vt nunquam fiat in alio, iam verò 2do intentionaliter consideratum definitur, esse id, quod de vno tantum prædicatur, puta Identice non formaliter, quæ definitiones conueniunt Individuo determinato, non autem vago, quod est medium inter naturam vniuersalem & singularem.

V.

Diuisio differentiarum in Communem, Propriam & maximè propriam est recta, illaq; Analoga, cuius diuisionis tertium duntaxat membrum constituit hoc Prædicabile scilicet differentiam. Eius definitio, quæ est prædicari de pluribus specie differentibus in Quale *Quid*, benè intellecta, potest conuenire non solum subalternis, sed etiam infimis differentiis; præter differentias subalternas dari vltimas cum suis speciebus conuertibiles certum est. Porro differentiarum superiores formaliter sumptæ, non includuntur in differentiis atomis, imò nec genera, vnde genera & superiores differentiarum prædicantur de differentiis infimis Identice, quælibet verò differentia, siue superior siue inferior, includitur formaliter in sua specie quam constituit. In esse tertij prædicabilis, non constituitur per ordinem ad propria Individua, nec per ordinem ad speciem quam constituit, aut per ordinem huius speciei, omnisq; differentia est nobilior ac perfectior suo genere.

VI.

EX 4. modis Proprij, solus 4tus, habet rationem 4ti Prædicabilis, constituiturq; in esse Vniuersalis per ordinem ad inferiora talis speciei. Accidentis Logici definitio hæc, quod potest adesse & abesse sine subiecti corruptione, secundo intentionaliter est intelligenda, solaq; aptitudinalis inherens est de essentia illius, constituiturq; in esse Vniuersalis per ordinem ad subiecta, quæ denominatur.

VII.

Præter æquivoca & vnioca dantur Analoga media; in Attributionis & Proportionalitatis rectè diuisa, & ab analogatis taliter sicut vnioca abstrahi non possunt, Duæ diuisiones & totidem Regulæ antepredicamentales conuenienter assignantur. Præter 10. Prædicamenta non possunt dari plura, quæ inter se sunt impermixta, in hac diuisum Ens significat Essentiam non existentiam.

i

VIII.

Substantiæ (quæ est prior accidentibus tempore, definitione, & cognitione) Ratio formalis est esse per se, cuius diuisio in primam & 2dam, est subiecti in accidentia, ex proprietatibus verò 6. istis (non esse in subiecto, Dici de prima si sit 2da, primam significare hoc aliquid, 2dam verò quale quid, non habere contrarium, non suscipere magis & minus, & esse contrariorum susceptiuam) prima & vltima tantum sunt quarto modo proprietates.

IX.

Ratio formalis Quantitatis consistit in extensione partium in ordine ad se, hinc substantia corporea ante Quantitatem nullas habet partes. Quantitas in continuam & discretam tanquam in species subalternas rectè diuiditur. Veræ species Quantitatis continuæ sunt linea, superficies & corpus, Locus verò motus, & tempus tantum reductiuè, Discretæ autem numerus est vera species oratio verò non item, nisi fortè sumatur ratio mensuræ, non ratione extensionis. Ex proprietatibus Quantitatis, quæ sunt non habere contrarium, non suscipere magis & minus, & secundum Quantitatem res dicuntur æquales vel inæquales, sola tertia est 4to modo sumpta. Qualitas porro adæquatè tanquam genus in species, diuiditur in Habitum & Dispositionem, Naturalem potentiam & impotentiam, passionem & patibilem qualitatem tum formam & figuram, cuius diuisionis sola primi membri duo vocabula s. Habitus & dispositio duas essentialiter constituunt species, alia verò non nisi accidentaliter. Ex proprietatibus Qualitatis quæ sunt habere contrarium, suscipere magis & minus & secundum Qualitatem res dicuntur similes vel dissimiles, sola vltima, est quarto modo proprii.

X.

AD hoc vt sit Relatio realis, requiritur subiectum reale, fundamentum reale terminus realis existens realiter, & distinctio realis fundamenti ac termini, Fun-

ni, Fundamenta Relationis realis sunt tria, hæc: vnitas & numerus, Actio & Passio, Mensura & Mensurabile, à quibus omnibus relatio distinguitur realiter. Porro vnitas Relationum specifica ab vnitate tam fundamenti quam termini specifica, distinctio verò à distinctione specifica alterutrius s. fundamenti vel termini desumitur. Vnitas verò & distinctio numerica sumitur ex vnitate vel distinctione numerica subiecti; hinc multiplicatis terminis relationis eiusdem speciei, non multiplicantur in eodem subiecto relationes, sed quasi extenduntur: tandem ex Proprietatibus Relatiuorum istis: habere contrarium, non suscipere magis & minus, dici ad conuertentiam, & esse simul naturā ac cognitione, posteriores duæ, sunt quarto modo propriae.

XI.

VLtima sex Prædicamenta sunt quid simpliciter absolutum, connotant tamen aliquid extrinsecum, nec sunt quid aggregatum ex absoluto & respectiuo, sed tantum sunt Relationes secundum Dici. Oppositionis diuisio in Relatiuam contrariam, priuatiuam, & contradictoriam est recta, illaq; analogā, inter has contradictoria est maxima. 5. Modi Prioris, tres modi simultatis, 6. quasi species motus late sumpti, & 7. modi habendi rectè sunt à Philosopho assignati.

XII.

ORatio vt totum essentiale in vocem & significationem, vt totum causale in Perfectam & imperfectam, vt totum Vniuersale in Enunciatiuam & non Enunciatiuam, tandem vt totum integrale in nomen & verbum rectè diuiditur., Propositio, quæ est simplex qualitas, describitur, quod sit oratio verum vel falsum significans, cuius proprietates sunt tres: oppositio, æquipollentia & conuersio. Ex propositionibus singularibus contradictorijs de futuro contingenti, neutra contradictoria est determinatè vera aut falsa ante determinationem causæ præsertim primæ, deniq; veritas formalis tantum in secunda mentis operatione s. Compositione & Diuisione propriè reperitur.

XIII.

Licet ad discursus essentiam, necessaria sit pluralitas cognitionum, non tamen Obiectorum, ad quod & Iudicium illatum requiritur, in quo formaliter consistit. Sumptus discursus formaliter, rectè diuiditur in consequentiam strictè sumptam & argumentationem, hæc verò in syllogismum, Inductionem, Enthymema & Exemplum, quæ diuisio est analogā. Syllogismi ab Aristotele definiti, principia constitutiuā & dirigentia rectè sunt assignata, tum tres figuræ, & 19. modi rationabiliter inuenti. Omnis doctrina & disciplina, puta discursiua, fit ex præexistenti cognitione. Duæ præcognitiones istæ: an est, & Quid est, ad omnem Demonstrationem requisitæ, tum tria præcognita hæc: Principium, Subiectum, & passio; ac conditiones demonstrationis istæ, Dici de omni, per se, & Quatenus ipsum, rectè assignantur ab Aristotele: Medium potissimæ demonstrationis est definitio subiecti. Diuisio Demonstrationis in propter Quid & Quia, est adæquata, quæ si spectetur ex parte certitudinis quam generat, est vniuoca, si verò ex parte obiecti perfectè scientifici, est analogā. Porro assensus præmissarum, est causa efficiens instrumentalis assensus conclusionis.

XIV.

Scientia quæ est simplex, Qualitas, ab Aristotele rectè definitur, quod sit habitus certus & euidens per demonstrationem acquisitus, & hæc definitio debet intelligi de scientia naturali, quæ ratione dependentiæ diuiditur in subalternantem & subalternatam, harum & obiecta & principia sunt distincta, ac subalternata sine subalternante acquisita, potest dici scientia licet imperfectè, quæ si addit supra obiectum subalternantis differentiam accidentalem non qualemcunq; sed talem ex cuius additione constituatur Ens scibile, dicetur verè subalternata. Porro vnitas & distinctio scientiarum Generica, sumitur ex abstractione eadem vel diuersa, specifica verò ab vnitate vel distinctione principiorum intra eandem abstractionem contentorum. Scientia vt sic distinguitur ab opinione,

one, fide, solertia, imo & ab Intelligentia, Prudentia & Arte, non tamen à sapientia ex æquo, hæc licet iudicet non solum de Conclusionibus, sed etiam de principiis, non est tamen perfectior Habitus quam Intelligentia, Habitus primorum principiorum qui dicitur Intelligentia, partim est a natura, partim ab exteriori principio, estq; realiter distinctus a speciebus intelligibilibus. In eodem Intellectu, nec quo ad actus, nec quo ad habitus, nec quo ad utrumq; mixtim, potest esse simul scientia cum opinione de eodem obiecto, multominus cum errore, imo nec cum fide, si sit scientia naturalis.

XV.

DE Syllogismo Topico, qui est Ratiocinatio ex probabilibus sumptionibus probabilem inferens Conclusionem, & ratione ordinis congruam, & ratione Doctrinæ sufficientem Aristoteles reliquit scientiam. In Locis, differentia maximarum est quadruplex, ipsa verò maxima est multiplex. Porro Quæstio Dialectica, Disputatio demonstratiua, problema, propositio, principium & Conclusio materialiter idem sunt, & rationibus formalibus tantum differunt, problema Dialecticum pro quadruplici Prædicatorum numero, etiam est quadruplex. Præter Syllogismum Demonstratiuum, & Probabilem, dari Sophisticum constat, qui cum habeat sumptiones, quæ videntur esse probabiles, non tamen sunt, ideo causat deceptionem, & de hoc in duobus Libris Elenchorum Sophisticorum, sufficienter tractat Aristoteles, non quidem assertiuè, sed discretiuè.

CONCLUSIONES EX PHILOSOPHIA NATVRALI.

I.

Physica est verè & propriè scientia, illaq; speculatiua, impropriè subalternata Metaphysicæ, & quo ad omnes suas partes vna secundum speciem atomam, cuius obiectum formale & adæquatum est Ens mobile radicaliter sumptum. Principia rerum naturalium in fieri sunt tria, materia, forma & priuatio, ex quibus forma & priuatio sunt contraria, contrarietate primâ; in facto autem esse sunt duo, scilicet Materia & forma, quibus ratio principij analogicè competit.

II.

Materia prima, ita est pura potentia, vt secundum se nullum includat actum etiam Entitatum, imo nec existentiam, vnde existit tantum per existentiam formæ & compositi Substantialis, sine qua nec per absolutam Dei potentiam potest existere, nec habet vnitatem specificam vel numericam positiuam, sed tantum negatiuam, quæ licet sit radix corruptionis, ipsa tamen est ingenerabilis & incorruptibilis, habet tamen appetitum ad omnes formas substantiales. Priuatio, quæ dicitur carentia formæ in subiecto apto, realiter negatiuè distincta à materia, est per se principium rerum naturalium in fieri, & licet sit à parte rei, in recto tamen dicitur Ens rationis, estq; carentia formæ specificæ & Individuatæ.

III.

Forma Substantialis Physica, est actus primus Corporis Physici seu materiæ primæ; licet verò omnes formæ Substantiales materiales in generatione Substantiali educantur depotentia materiæ, exceptis formis cælorum, quæ in prima sui productione sunt concreatæ ad creationem totius; tamen formæ spirituales, vt sunt animæ rationales à solo Deo creantur, formæ verò accidentales, quæ non habent necessariam connexionem cum subiecto, omnes educuntur, de potentia illius, quæ verò habent, nullæ educuntur, sed vel cœducuntur, si forma Substantialis ex qua oriuntur, fiat per educationem, vel concreantur, si forma Substantialis fiat per creationem, sicut autem plures formæ Substantiales non possunt simul informare vnâ numero materiam etiam de absoluta potentia, ita nec vna forma plures materias.

IV.

Compositum Physicum essentialiter & intrinsecè constituitur ex materia & forma, idq; immediatè & sine vllò nexu ab illis distincto, quod, vt & aliud quoduis Totum à suis partibus simul sumptis & vnitis non distinguitur realiter, sed tantùm ratione ratiocinatâ.

V.

Natura, quæ est principium & causa motûs & quietis eius, in quo est, primo & per se, & non secundum accidens; rectè diuiditur in materiam & formam; nomen naturæ conuenit materiæ & formæ vniuocè. Porro natura realiter distinguitur ab arte, hæc verò virtute propriâ & immediatè nullo modo potest efficere opera & effectus naturæ, sed solùm mediatè, i.e. applicando actiua passiuis, quod est fieri tantùm secundum quid, & aliququaliter. Vnde si in operationibus miros effectus producentibus, adhibeantur ceremoniæ progressionis, stationis, manuum eleuationis, respectiōis membrorum ad certam partem, characteres peregrini & alia signa, nullam connexionem moralem vel Physicam cum effectibus habentia, sunt à Magia diabolica.

VI.

Causa, quæ definitur esse id, ad cuius esse sequitur aliud, est quadruplex, Materialis, Formalis, Efficiens, & Finalis, & de omnibus vniuocè dicitur; sicut autem omnis causa est prior suo effectû prioritate naturæ, ita & perfectior illo, omnis verò causa realis distinguitur à suo effectû realiter. A duabus verò causis Totalibus eiusdem generis & ordinis, non modo simul, sed nec diuisim sumptis, vnus idemq; numero effectus, etiam supernaturaliter fieri non potest.

VII.

Causalitas materiæ in actu primo, est propria & nuda eius Entitas, in actu verò secundo, est vnio ipsius cum forma seu sustentatio formæ. Similiter, Causalitas formæ in actu primo, est propria & nuda eius Entitas, in actu verò secundo, est vnio ipsius cum materia seu informatio materiæ. Idea propriè spectat ad Causam formalem extrinsecam, licet impropriè possit spectare ad efficientem & finalem.

VIII.

Causa efficiens est id, vnde primò incipit motus, cuius principium Radicale agendi, est ipsa forma Substantialis, proximum verò & immediatum, sunt accidentia; eius Causalitas est actio exercita. Causæ secundæ in agendo, dependent à concursu Causæ primæ, non tantùm simultaneo, sed & præuio. Porro de ratione Instrumenti est, agere vt motum à Causa principali, habeat tamen virtutem sibi propriam & actionem præuiam, quæ reddatur Capax ad producendum effectum Causæ principalis.

IX.

Finis est vera Causa realis, cuius ratio formalis constitutiuæ in actu primo, est sola bonitas secundum esse reale, secundum quod mouet appetitum, non verò secundum esse apprehensum, licet apprehensio sit conditio sine qua non. Causalitas finis, est motio exercita voluntatis Metaphorica. Natura in suis operationibus semper agit propter aliquem finem, quæ sumpta pro Causis secundis, tantùm per se secundo intendit monstra: Fortuna & Calus dantur, solùm in rebus creatis. Porro Contingentiæ & necessitatis in rebus naturalibus, in genere Causæ efficientis est summa Dei efficacia, proxima verò & formalis ratio, contingentia quidem, est defectibilitas Causæ secundæ & impedibilitas per concursum alterius Causæ; necessitatis autem est Indefectibilitas & inimpedibilitas eiusdem Causæ secundæ proximæ.

X.

Motûs definitio hæc: est actus Entis in potentia, prout in potentia: competit etiam mutationibus instantaneis, idq; tantùm illis, quæ sunt actus imperfecti, qui à suo termino ad Quem, tum ab Actione & Passione distinguitur vt res à modo, comparatus ad Actionem & Passionem Physicè consideratas, habet se, vt superius essentialè analogum, non verò, vt subiectum, Metaphysicè verò, habet se vt modus contingenter eis conueniens; omnis autem motus etiam localis subiectatur in mobili. Porro subiectum actionis transeuntis originatiuè

seu Causaliter est agens, formaliter verò seu Relatiuè est passum. Propriè dictus motus, seu successiuus per se terminatur ad Quantitatem, Qualitatem & ubi, cuius vnitas Generica desumitur ex vnitate Prædicamenti, ad quod terminatur, specifica verò non tantum à termino ad Quem, sed etiam a medio formaliter sumptis. Numerica tandem sumitur ex vnitate mobilis, termini ad Quem, & temporis. Contrarietas motuum per se primo & formaliter, prouenit tantum ex contrarietate termini ad Quem; licet verò idem mobile possit moueri simul duobus motibus contrarijs secundum diuersas partes, vel si vno per se, altero moueatur per accidens, naturaliter tamen non potest moueri per se simul secundum eandem partem. XI.

Continuum non ex solis componitur indiuisibilibus, sed etiam ex partibus continuis copulatis per indiuisibilia, vnde in continuo vere dantur actu indiuisibilia tam continuatiua quam terminatiua, modaliter distincta a partibus illius. Infinitum actu, etiam supernaturaliter dari non potest, tam secundum substantiam, quam secundum Quantitatem aut Qualitatem, ac ideo qualibet res habet suæ magnitudinis & paruitatis terminum. XII.

Ratio formalis Loci est immobilitas, quæ spectatur in superficie formaliter sumpta, ex determinata distantia ad puncta fixa, qualia sunt poli & centrum mundi; hinc omnibus & solis Corporibus conuenit esse per se in loco circumscriptiuè, excepto supremo cælo, quod secundum partes, idq; tantum in potentia, est in loco. Licet verò duo Corpora in eodem loco, possint esse simul supernaturaliter, vnum tamen Corpus in pluribus locis circumscriptiuè etiam per absolutam Dei potentiam esse non potest. Vacuum Physicum naturaliter dari non potest, bene tamen supernaturaliter, quo dato, Corpus in eo moueretur successiuè, non verò in instanti. XIII.

Tempus est verum Ens reale, distinctum realiter à motu, estq; vnum vniuersale & extrinsecum, plura tamen sunt particularia & intrinseca, cuius existentia solum reperitur in instanti, non verò in aliqua parte, & hoc Substantiæ corruptibiles mensurantur non solum quo ad operationes, sed & quoad suum esse. XIV.

Omne quod mouetur, necessario debet habere Causam efficientem sui motus realiter à se distinctam, illamq; approximata siue indistantem, vnde cum in mouentibus per se subordinatis, non possit esse processus in infinitum, ideo ex motu rectè colligitur vnicus esse Motor omnino immobilis.

EX LIBRIS de CÆLO & MVNDO

I.

Licet Mundus sit in temporis principio creatus, potuit tamen, tam quoad Entia permanentia, quam quoad successiua, per se loquendo, ab æterno creari; nam per accidens quibusdam successiuis, vtpotè generationi humanæ repugnat æternitas; tamen verò nullâ ratione Physicâ demonstrari possit, non esse plures mundos, valde tamen conforme est fidei, asserere de facto tantum vnum esse mundum, attamen possunt dari plures, esto verò sit perfectus, possunt tamen dari perfectiores saltem accidentaliter, potestq; esse æternus à parte post, licet defacto non durabit, nisi quoad principales sui partes, scilicet Cælos & Elementa, idq; sub statu perfectiori. II.

Cælum constat materiâ & formâ, cuius materia est diuersæ rationis à materia sublunarium, informatur nullâ animâ propriè loquendo. Et quia est diuersæ naturæ ab Elementis & mixtis, hinc est, quod non habeat 4. contrarias qualitates, nec est ab intrinseco corruptibile, insunt tamen Cælis accidentia sublunariis communia eiusdem speciei, qualia sunt Quantitas, densitas, raritas, lux,

Iux, motus & figura. Maculæ quæ in Luna apparent, sunt partes rariores corporis Lunaris permittentes solis radios ulterius transire.

III.

Cæli mobiles sunt decem, vndecimum autem immobile dictum Empyreum, Omnes inter se contigui, Sphæricæ figuræ & diuersæ speciei ac nobilitatis. Porro astra & Planetæ distinguuntur tam inter se, quàm à Cælis, quibus sunt contigui, omnesq; ex natura sua habent aliquid lucis, maiorem tamen à Sole mutantur. Causa scintillationis in Stellis fixis refunditur in debilitatem visus nostri & nimiam distantiam. Omnes Cæli excepto Empyreo, mouentur immediate ab Intelligentiis, quorum motus circularis, est solum naturalis passiuè, non verò actiuè, nisi fortè secundum quid: est præterea regularis ac ordinatus, & cuilibet Cælo tantum vnus naturalis, ille scilicet quem habet à propria Intelligentia; Omnes autem Cæli mouentur pluribus motibus, & quidem contrariis, excepto primo mobili. Licet autem Cæli & Stellæ influant in hæc inferiora, per se tamen & directè tantum influunt in Corpora, in vires autem animæ, quæ sunt actus organorum, nonnisi indirectè & per accidens, in potentias autem animæ Rationalis magis adhuc indirectè ac remotè. Porro cessante Cælorum motu, licet non cessent in istis inferioribus actiones intentionales, vt est illuminatio & immutatio medijs, cessabit tamen in eis omnis motus, & actiones materiales; hinc futuri euentus, qui ex solo motu & ordine Cælorum dependent, possunt prædici certò, qui verò ab influxu Cælorum & Elementorum habent dependentiam, tantum coniecturaliter, qui deniq; à voluntate humana pendent, neutro modo prævideri possunt, maximè in particulari.

EX LIBRIS de GENERATIONE & CORRUPTIONE.

I.

Generationis substantialis (quæ est mutatio naturalis) subiectum, est sola materia prima nudè sumpta, Terminus verò illius Primarius *Quo*, & quidem partialis est forma substantialis, totalis autem & primarius in intentione, est natura totalis, terminus verò primarius *Qui*, est suppositum, secundarius autem sunt proprietates. Corruptio Substantialis, licet sit mutatio naturalis respectu materiæ primæ, quæ secundariò inclinatur in illam; non tamen est per se intentata à natura particulari, sed tantum ab Vniuersali, idq; per se secundo: cum dicitur: generatio vnius est corruptio alterius, intelligi debet tantum concomitanter, non verò identicè, multò minùs formaliter. Accidentia porro non remanent eadem in genito, quæ erant in corrupto, quod est dicere, in corruptione substantiali, fieri resolutionem vsq; ad materiam primam.

II.

Alteratio, quæ est motus continuus, adæquatè diuiditur in Alterationem specialiter dictam, Intensionem, & Remissionem, tanquam in tres species, motusq; intensionis ac remissionis ad solam Qualitatem terminari potest, idq; ad tertiam eius speciem. In qua intensio fit tantum per maiorem radicationem in subiecto. Porro Nutritio & augmentatio actiuæ, non sunt duæ actiones realiter distinctæ, est solum virtualiter, passiuæ autem, sunt duæ mutationes realiter distinctæ, ambæq; successiuæ. Augmentatio fit secundum omnes partes rei, quæ augetur, viuensq; toto augmenti, imò vitæ tempore manet idem numero.

III.

Ad hoc vt agens agat, debet esse maior illius actiuitas, quàm resistentia passi, omneq; agens communicans in materia transmutabili cum passo, reparitur à suo passo. Mixtio, quæ est miscibilium alteratorum vnio, reperitur non solum inter Elementa, sed etiam inter liquores habentes contrarias qualitates, siue illi sint diuersæ speciei, siue eiusdem. Causa efficiens principalis mixtionis

in non viuentibus, sunt Cæli & astra, in viuentibus autem sunt Intelligentiæ motrices Cælorum, & maxime DEVS. Elementa porro non inmanent in mixtis formaliter, sed virtualiter, ratione primarum Qualitatum ad mediocritatem redactarum.

IV.

Cuiuslibet Elemento conveniunt duæ primæ Qualitates, ita ut ignis sit in summo calidus & siccus, Aër in proportionata temperie, est calidus & humidus, Aqua est in summo humida, & citra summum frigida, Terra denique est summè frigida, & citra summum sicca, quarum qualitarum in Elemento, minus intensa, non habet permixtionem suæ contrariæ qualitatibus, Symbolarumque qualitates, in quibuscunque sunt Corporibus, sunt eiusdem speciei. Porro quodlibet Elementum, potest ex quolibet alio generari, & quidem Elementa Symbola, facilius quam dissymbola transmutantur, licet per accidens possit oppositum contingere. Quamvis autem ex duobus Elementis dissymbolis, possit generari tertium Elementum specie distinctum, non tamen ex Symbolis. In nullo mixto, potest dari temperamentum uniforme, seu æquale ad pondus. Res semel corrupta si sit permanens, non potest naturaliter, si verò sit successiva, nec supernaturaliter potest reproduci eadem numero.

EX LIBRIS de ANIMA.

I.

Animæ diuisio in Vegetatiuam, Sensitiuam & Intellectiuam est recta, & suo modo vniuoca, ex quibus Vegetatiua in Sensitiua, & vtraque in Intellectiua continetur formaliter. Animæ animalium imperfectorum, imò & plantarum licet sint diuisibiles, non tamen anima rationalis, & animæ animalium perfectorum. Potentiæ, (quæ realiter distinguuntur ab anima, ita ut nec per absolutam Dei potentiam anima possit sine illis, immediate operari) immediate specificantur ab actibus, mediate verò ab obiectis formaliter sumptis, quarum potentiarum, licet non organicæ subiectionem immediatam in ipsa anima, organicæ tamen subiectionem in toto composito. Licet autem 5. sint genera potentiarum vitalium siue animæ, ut anima est, s. vegetatiuum, sensitiuum, appetitiuum, locumotiuum & Intellectiuum, gradus tamen viuentium seu modi viuendi, sunt tantum 4. hi, vegetatiuum, sensitiuum, locumotiuum & Intellectiuum.

II.

Potentia animæ Vegetatiuæ essentialiter ac realiter inter se, & à calore naturali distinctæ, sunt tres: Nutritiua, Augmentatiua, & Generatiua, ex quibus priores duæ, sunt propriæ quarto modo proprii, generatio verò propriè sumpta non. Sensus, (qui est potentia merè passiva respectuè ad obiectum, actiua autem respectuè ad sensationem) obiectum, seu sensibile externum, est triplex. Proprium commune, & per accidens, tam verò proprium, quam Commune est duplex; hinc & sensus externi sunt 5. 1. Visus, cuius Obiectum formale est visibile seu coloratum, ut illuminatum, Subiectum seu organum, est humor Crystalinus simul cum nervis opticis; Medium est Corpus diaphanum, ut aër, aqua, Crystalus. Porro visio fit per intus susceptionem seu receptionem speciei ab obiecto, non verò per emissionem radiorum visualium. 2. Auditus, cuius Obiectum est sonus, Organum est aër innatus cum nervis auditorijs a cerebro ad aures descendentibus, Medium soni, secundum suum esse reale, est solus aër, iam autem secundum esse intentionale, est etiam aqua, & plura Corpora fluida. 3. Olfactus, cuius Obiectum est odor, Organum sunt duæ carunculæ seu processus mammillares, uniti nervis, quibus continuantur, Medium odoris est aër & aqua. 4. Gustus, cuius Obiectum est sapor, Organum est nervus mollis, per totam linguam sparsus, maxime in cuspide linguæ residens, Medium est Caro, nervo saporis sentienti supposita. 5. Tactus, cuius obiectum, sunt qualitates tangibiles tam

primæ quam secundæ, quas tantum secundum excellentias percipit. Organum tactus, est solus nervus sparsus per totum animalis Corpus, qui a medicis Tactinus dicitur, Medium est Caro.

III.

Sensus interni sunt 4. ab Externis & ab inuicem realiter distincti, quorum 1. est Sensus communis, cuius munus est, cognoscere omnia sensibilia externa à sensibus externis percepta, ac inter illa discernere, sensuumq; externorum sensationes percipere. Obiectum formale & adequatum illius, est Sensibile abstrahens à sensibilibus communibus, & à sensationibus sensuum exteriorum. Organum, est prima, in anteriori Capitis parte, cerebri cellula, in qua radican- tur omnes nervi sensibus externis in organa deputati. 2. Phantasia in homi- nibus specialiter dicitur Imaginativa, quæ apprehendit res sensatas, à Sensu com- muni perceptas, & eas in absentia conservat, residetq; in secunda cerebri caui- tate. 3. Æstimativa, in hominibus dicitur Cogitativa, quæ percipit rationes non sensatas præsentis. v. g. amicitia, vel inimicitia; & hæc residet in tertia caui- tate cerebri. 4. Memoria, quæ in hominibus specialiter dicitur Reminiscencia, cuius munus est, rationes non sensatas singulorum sensibilibus, perceptas ab Æsti- mativa, retinere in eorundem absentia, & hæc residet in posteriori parte capi- tis. Affectiones porro sensuum sunt duæ: Somnus, qui est ligatio sensuum externorum, ad quietem & salutem animalium instituta: & Vigilia, quæ est o- mnium sensuum externorum aut saltem aliquorum, solutio & libertas. So- mnia autem sunt apparitiones quædam exhibitæ per sensus internos, in illis, qui somno consopiti sunt, ex quibus pauca futura, illaq; tantum naturalia sciri pos- sunt, nam futura contingentia libera, à solo Deo cognoscuntur, nec ulli per so- mnium innotescunt, nisi ipsi fuerint à Deo patefacta.

IV.

Anima Rationalis, est pure Spiritualis & incorporea, consequenter ab intrin- seco incorruptibilis ac immortalis; una est perfectior altera, etiam in perfe- ctione substantiali Individuali. Præter Intellectum possibilem, necessariò datur in anima rationali Intellectus Agens, realiter ab illo distinctus, cuius principale munus, est illuminare phantasmatum. Obiectum Intellectus possibilis, adæqua- tum, illudq; Extensivum seu terminativum, est Ens seu verum in tota sua latitu- dine; Intensivum autem seu motivum, alias proportionatum & specificativum Intellectus nostri, pro hoc statu, est sola Quidditas materialis, abstracta à condi- tionibus Individuantibus; unde singulare pro hoc statu tantum reflexè repræ- sentatur per speciem intelligibilem; Memoria porro Intellectiva, quæ est poten- tia spiritualis, non distinguitur ab Intellectu possibili, sicut nec synderesis, con- scientia, Ratio superior & Inferior. Cum verò tam sensus Interni, quàm Intelle- ctus, indigeant speciebus impressis, ad eliciendas suas cognitiones, igitur speci- es impressæ tam Intentionales, quàm Intelligibiles repræsentant formaliter sua Obiecta, unde species impressa, ita est formalis similitudo Obiecti, ut sit ipsum- met Obiectum, non quidem in modo naturali essendi, sed in esse intentionali; potentiaq; cognoscitiva unitur per identitatē cum specie, cōsiderata in esse repræ- sentativo, consequenter & cum Obiecto repræsentante. Porro Intellectio crea- ta, spectata quoad subordinationem cum effectu, est actio de Prædicamento Qualitatis, si verò spectetur eminenter & virtualiter, ie quantum ad emissionem & originationem effectus, est de Prædicamento Actionis, quæ Intellectio reali- ter distinguitur à specie expressa seu verbo mentis; Dictio verò seu productio verbi, est ipsa intellectio cum quadam formalitate modali. Per quamlibet ve- rò intellectiōnem creatam producitur verbum, excepta visione beatificā, & in- tellectio pro hoc statu naturaliter pendet ab operatione phantasie, quod etiam reperietur in damnatis post resurrectionem, non verò in Beatis.

V.

Præter appetitum Innatum, datur appetitus Elicitus, qui est potentia passiva vitalis, apta nata moveri ab Obiecto apprehenso cognito, & hic alius est Ani- malis

malis seu sensitiuus, alius Rationalis, qui dicitur Voluntas. Sensitiuus subdiuiditur in Concupiscibilem & Irascibilem. Porro Voluntas secundum se & simpliciter, est imperfectior Intellectu, & libera in suis actionibus, neq; vult necessario, quæcunq; vult, sed tantum Beatitudinem, seu bonum in communi, idq; necessitate specificationis, alia verò particularia liberè appetit, mouetq; alias animæ potentias per modum agentis, applicando eas ad exercitia. Potentia Obedientialis in rebus creatis, passiuæ respectu actuum & effectuum supernaturalium, de facto datur, quæ est ipsa Entitas creaturæ subiecta Deo, estq; eiusdem speciei infimæ in omnibus & ad omnia.

CONCLVSIONES EX METAPHYSICA.

I.

Metaphysica est verè Sapiencia, & gubernatrix aliarum scientiarum, cuius Obiectum formale & adequatum, est Ens quatenus Ens, vt substat abstractioni ab omni materia. Et quoniam Ens nominaliter sumptum, est transcendens respectu suorum inferiorum, ideo est Analogum ad illa, vtraq; analogiâ, nec habet Conceptum aliquem perfectum & distinctum, sed solum imperfectum & confusum, ac secundum quid præcisum à suis inferioribus.

II.

Ens habet veras & Reales, illasq; Metaphysicas proprietates, quæ ab illo solum virtualiter distinguuntur, suntq; tantum tres, Vnum, Verum & Bonum, quæ pro materiali dicunt ipsum Ens, pro formali verò aliquid reale in Ente, s. modum, qui non exprimitur nomine Entis, de illis tamen Ens Quidditatiuè prædicatur. Hinc Vnum, licet pro formali dicat aliquid positium, Enti tamen addit, solam diuisionis negationem. Ens porro diuiditur in Vnum & Multa, ex quibus vnum est simpliciter Ens, multa verò Ens secundum quid, vnum autem & multa opponuntur per modum priuationis. Forma Substantialis incompleta, etiam & anima rationalis indiuiduatur à materia, hæc verò per ordinem ad quantitatem indiuiduatur; iam autem substantiæ materiales completæ seu composita materialia Indiuiduantur a materia signata quantitate. Tandem formæ Spirituales completæ vt sunt Intelligentiæ, per suas differentias específicas immediatè indiuiduantur. Licet porro accidentia à proprijs subiectis extrinsecè, ab ordine verò, quem ad ipsa dicunt, indiuiduantur intrinsecè; Quantitas tamen hoc habet peculiare, quòd secundum aliquam rationem à seipsa indiuiduetur, tamen si secundum alias rationes indiuiduetur à suo subiecto. Impossibile verò est, etiam de absoluta Dei potentia, duo accidentia solo numero distincta, esse simul in eodem subiecto.

III.

Veritas, principalius denotans Entitatem, quàm relationem ad intellectum; Transcendentalis, consistit in aliquo positio seu conformatione, primario ad Intellectum Diuinum, secundario autem ad creatum; Formalis autem consistit in conformitate & adæquatione Conceptus Formalis ad Conceptum Obiectiuum, seu Intellectus, ad rem cognitam, quæ conformitas, est ordo Transcendentalis. Quod pertinet ad Bonum, huius Ratio consistit in Fine, quatenus habet conuenientiam quandam primario cum voluntate Diuina, secundario autem cum voluntate creatæ.

IV.

Essentiæ omnium rerum, habent Causam sui effecticem Deum, nec sunt aliquid reale, actuale & positium ab æterno extra illum. Porro Essentia rerum, quæ

quæ à Deo immediatè creatæ sunt, comproducitur ad creationem totius, quæ verò producuntur à Causis secundis, comproducitur ab iisdem Causis secundis etiam principaliter. Suppositum seu subsistens in creatis, realiter distinguitur à natura, aliquid positivum realiter ab ipsa distinctum superaddens. Existencia substantiæ est solum accidens prædicabile, cuius Causa principalis & proxima, est solus Deus, creaturæ verò ut Causæ instrumentales. Existentiæ effectus est, rem ultimò substantialiter complere, existencia in omnibus rebus creatis, realiter distinguitur ab Essentia & Subsistentia. Accidentia habent propriam existentiam accidentalem, distinctam ab existencia substantiæ, tanquam rem à re, quæ est inhærentia aptitudinalis. Natura seu Essentia prius recipit Subsistentiam, quàm Existenciam, hæc verò recipitur in supposito ut in subiecto *Quod*, in Essentia verò, & in partibus eam constituentibus, sicut & in Subsistentia tanquam in subiecto *Quo*. Porro Subsistentia & Existencia, licet naturaliter non possint esse in rerum natura separata ab Essentia, supernaturaliter tamen possunt, per ordinem tamen & dependentiam ab Essentia, sine qua non possunt produci.

Soli Deo Honor & Gloria.



SUB FELICISSIMIS AUSPICIIS,

Magnifici, Perillustri, & Reuerendissimi Domini.

D. M. MARTINI WINKLER,

S. Th. DOCTORIS, & PROFESSORIS,

Ecclesiarum Cathedralis, Crac: CANONICI, Collegia-

tarum, Sendomiriensis, PRÆPOSITI, Scholastici Kielcensis,

Curati Premycouiensis, Contubernij Hierosolymitani Proui-

oris S. R. M. SECRETARII, Studij Vniuersitatis

Cracoviensis, Generalis & Vigilantissimi,

RECTORIS.

que a Deo immediate creatæ sunt, comprehenduntur ad creationem totius, que
 vero producantur a Causis secundis, comprehenduntur ad illam Causam secundam
 etiam principalem. Supponitur tamen subsistentia in creatis, realiter distinguenda
 a natura, aliud possunt in realiter ab ipsa distinctum subsistere. Existens
 substantia est totum accidentis per se subsistentis, cuius Causa principis is & proxima
 est tota illa, creatrix vero et Causa instrumentalis. Existens effectus est
 totum vniuersum substantialem completum existentis in omnibus rebus creatis, reali-
 ter distinguendum ab Essentia & Subsistentia. Accidentia habent propriam existen-
 tiam accidentalem, distinctam ab existentia substantialem, tanquam non a se, que
 est in rebus accidentibus. Natura seu Essentia prius recipit Subsistentiam,
 quam Existentiam, hæc vero recipitur in opposito ut in subiecto. Quod, in Es-
 sentia vero, & in rebus cum constitutibus, licet & in Subsistentia tanquam
 in subiecto. Porro Subsistentia & Existens, licet naturaliter non possint
 esse in rebus natura separata ab Essentia, substantialem tamen possunt, per
 ordinem tamen & dependentiam ab Essentia, hæc que non possunt produci

Soli Deo Honor & Gloria.



SUB RELIGIOSISSIMIS AUSPICIIS

Magistro, Viri SSimo & Reverendissimo Domino

D. M. MARTINI WINKLER,

S. TH. DOCTORIS, & PROFESSORIS,

Ecclæsiarum Cathedralis Crac. Canonici Collegii

Sancti Sandomienensis, P. R. POSITI, Scholastici Kielesensis

Curæ Prebendæ, Interim Hieronymi Prom.

Joannis S. R. M. SEC. ARI. Studi Vniuersitatis

Cracoviensis, Canonicus & Vigilantissimus

RECTORIS



